

Kerajaan haramkan komik propaganda komunis

AstroAwani

23 Oktober 2019

Firdaus Azil,

KUALA LUMPUR: Kementerian Dalam Negeri (KDN) telah mewartakan perintah larangan terhadap penerbitan komik kontroversi “Inisiatif Jalur Dan Jalan Meraih Manfaat Bersama”, bersekali dengan versi Bahasa Inggeris dan Bahasa Cina.

Dalam satu kenyataan hari ini, kementerian berkata, larangan itu dikuatkuasakan ekoran kandungan penerbitan itu mengandungi elemen yang boleh memudaratkan ketenteraman dan keselamatan orang awam, serta kemungkinan menggemparkan fikiran masyarakat.

Kandungan penerbitan itu antara lain cuba mempromosi ideologi komunisme dan sosialisme, menyebarkan fakta salah dan mengelirukan mengenai perjuangan komunis, serta membangkitkan sokongan dan simpati terhadap perjuangan fahaman itu.

Ia juga boleh menimbulkan keraguan kepada pembaca, khususnya generasi muda mengenai sejarah Malaysia, serta mempertikai usaha pemimpin dan pejuang terdahulu mengenai kemerdekaan negara ini.

Sehubungan itu, KDN berkata, mereka yang mencetak, mengimport, menghasilkan semula, menerbit, menjual, mengeluarkan, mengeliling, menawarkan untuk menjual, atau memiliki, boleh dikenakan hukuman penjara tidak melebihi tiga tahun.

Selain itu mereka juga boleh didenda tidak melebihi RM20,000, atau kedua-duanya sekali.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/kerajaan-haramkan-komik-propaganda-komunis-220835>